

AVISONAN FALSO BUSCANDO TRAHADORNAN Y KENDENAN TA MANDA???

Ayera un persona a yama y a splica kico ta tumando lugar cu un lugar cu ta buscando trahador. El a duna di conoce cu "si bo no ta kere, trata bo mes".

Mi a busca un persona femenino, dune instruccion pa busca trabao manera a wordo publica pa e restaurant.

Mi amiga a solicita pa trabao, y a wordo contesta pa un juffrouw masha amable cune. El a splica di e necesidad di trabao y cu el a haci varios otro trabao di "mas prestigio" pero cu e mester di e trabao na e restaurant aki.

Ora a puntre ta pa cual trabao e ta solicita, el a pidi pa trabao di Dishwasher.

Aki el a bin tende: "Nos no tin mester di hende". Tambe "nos tin stranheronan na e puestonan ey caba".

E sorpresa a cay ora a wordo menciona: "Ta DOOV ta pone nos publica avisonan aki periodicamente, hasta si nos no mester di hende".

— Pero juffrouw, kico ta para anto cu ta Arubiano so mag di solicita?"

— "DOOV a bisa cu nos mester pone cu solicitantenan mester ta Arubiano".

Aki atrobe ta haya un ehemplo mas di kico ta pasando cu ponemento di aviso den corant.

Ora mester busca trahador di afo, por demostra cu avisonan a a ser poni tanto biaha, pero ta djies pa prolonga permiso di un cu tey caba, of pa por pidi permiso pa "un cu ta trahando caba".

E OTRO CASO DI AVISO PUBLICA

E otro caso ta di un establecimiento hindu (no di esnan cu tin decenas di aña na Aruba caba, pero di e recién yegadonan di ultimo añanan). Nan mester di salesgirl y cahero.

Bo ta yama y nan ta puntra ta cuanto aña bo tin y si bo ta Arubiano. Nan no ta puntra si bo tin experiencia caba.

Si bo ta Arubiano bo ta tende: "we will let you know!"

E persona cu a papia spaño pa mi cu voz masha sensual a puntra despues pa trabao di salesgirl.

"Mi ta colombiana, tin 4 aña na Aruba caba y a perde trabao di sales girl pasobra negoshi a cera."

— "Pasa pa nos conversa mañan mainta 8.30 or", el a tende mes ora.

Mi a pone un otro yama y como Arubiano no por a haya contesta

directo di "nos no kier bo".

— "How old are you?" (net locual nos tabata kier)

— "Mi tin 50 aña y mester di un trabao. Mi tin dos yiu pa cria".

— "Sorry, but ...ehm. you're too old".

Ta asina a bira na Aruba awor. Si bo ta mas cu trinta aña ta dolor pa bo haya un trabao. Si bo ta 40 aña, bo ta "afgeschreven" y si bo ta 50 aña, "busca stoel di sosiego".

Ningun caminda bo ta haya trabao mas ni si bo ta muriendo di hamber, ni si bo tin yiu pa cria y ningun hende pa yudabo y ni si bo bay biba di onderstand, bo no por biba 2 dia cu e placa cu bo ta haya, corda 3 dia. Tin hende cu te nan 80 aña di edad ainda ta fit fit pa por traha y sigui traha (awe mes por lesa di Libertad Lamarque cu ta cumpli 90 aña y ainda ta traha) pero na Aruba cu masha dolor un persona riba 50 aña por haya un trabao respetable y cu pago respetable.

Nan ta tumabo si pa Security Guard, pa traha na pomp di gasoline, pa chapi cura, pa mensahero. No ta puntra siquiera riba bo experiencia y bo conocimiento di cierto trabaonan.

"No meneer, no mevrouw, bo ta BIEUW y esey kiermeen cu bo no sa nada, no ta sirbi pa haci nada mas cu e trabao cu nos ta ofrecebo", ta e tipo di mentalidad cu tin awendia.

Pa e hendenan aki ningun politico ni gobernante ta saca un man, pero laga pasa cu eleccion ta den porta.....

NOS ARTISTANAN CU MESTER DI APRECIO

Ayera anochi den un conversacion cu un colega na Corsow, el a puntrami si mi sa cu Tica Giel ta na Corsow awe pa un concierto. "E mucha ey ta masha stima aki. E voz cu e tin ta di diamante", el a laga sa.....

Tica Giel a wordo invita special pa duna su concierto di "Pahra y Flornan" den concierto di misa di forti cu ta un ciclo di concierto cu ta ser teni regularmente.

E concierto ta e mesun cu el a tene exitosamente celebrando su tanto aña como artista clasico, cu acompañamento di maestro Dr. Livio Hermans, cu tambe lo acompaño na Corsow.

Dushi ta ora bo tende con nos artistanan ta ser aprecia na Corsow, y den exterior, mientras cu na Aruba sporadicamente ta mira e aprecio aki. Di Tica Giel, te awor mi a ripara cu el a goza di sosten grandi di nos hendenan.

Juby



20%
DESCUENTO

RIBA
TUR COS

Bin
probecha

Kaffie Morgen

Hopi mercancia nobo a jega :

Vaas y Adorno di Mexico - Vaas y Pronkstuk Chines
Lampi di piedra - Set di Servies - End Table
Tela di Cortina - Un Sortido Grandi di Flor
Pronkstuk di Pasco y hopi Tapijt



Furniture Outlet Center

Den Fergusonstraat 49

Horario: Diabierna 8 a.m. - 12 p.m. - 2 p.m. - 6 p.m. / y Diasabra 8 a.m. - 6 p.m. straight / Diadomingo 10 a.m. - 2 p.m.